



册府元龜  
卷之二  
至四

13  
849  
4





13  
849  
4



册府元龜

淮南李嗣京叅閱

西極文翔鳳訂正

豫章黃國琦較釋

帝王部

誕聖

夫帝王之生必有休應豈非天命所屬歷數斯在警  
生靈之耳目爲天飛之兆朕者乎故神祇幽贊靈物  
保護冥符夢感昭啓聖跡紛綸雜沓觸類而長諒不  
可談悉矣歷代而下質文斯變緣情之禮隨時而作



亦以極臣子之誠顯邦家之慶紀乃誕日崇乎美名  
繇是陳宴享之禮洽魚藻之歡設桑門之饌脩福田  
之事公卿士庶爲節物以相遺諸侯牧守奉貢珍而  
來覲斯亦一時之盛觀百王之所不易者矣

伏羲氏母曰華胥燧人之世有大人之迹出雷澤華  
胥履之生帝於成紀

神農氏母曰女登爲少典妃遊華陽有神人身龍首  
感女登於嘗陽而生帝

黃帝母曰附寶見大電光繞北斗樞星炤郊野感附  
寶而孕二十月而生帝於壽丘

少昊母曰女節黃帝時有大星如虹下流華渚女節  
夢接感而生帝

顓頊母曰女樞少昊之末瑤光之星貫月如虹感女  
樞於幽房之宮生帝於若水

高辛不見其母生而神靈自言其名曰契

堯母曰慶都觀于三河嘗有龍隨之旣而陰風四合  
赤龍感之孕十四月而生帝於丹陵

舜母曰握登見大虹意感而生帝於姚墟

夏禹母曰脩巳山行見流星貫昴夢接意感又吞神  
珠背剖而生禹於石

一云脩  
折而生



啓母曰塗山氏初禹治洪水通轅轅山化爲熊謂塗山氏曰欲餉聞鼓聲乃來禹跳石誤中鼓塗山氏往見禹方作熊而去至嵩高山下化爲石方生啓禹曰歸我子石破北方而啓生

湯母曰扶都見白氣貫月意感以乙日生湯故號天

乙

周文王母曰太任夢長人感已溲于豕牢而生文王

漢高祖以秦昭王五十一年生於豐臣欽若等曰自

月及無年初母媪嘗息大澤之陂夢與神遇時雷電

晦冥父太公往視則見交龍於上已而有娠遂產高

祖一云母名含始遊于維池有玉雞銜赤珠刻曰玉英吞此者王含始取而吞之

惠帝以秦始皇三十七年生於豐

文帝以漢王四年生初帝母薄姬高祖召欲幸之對曰昨暮夢龍據妾胸高祖曰是實貴徵也吾爲汝成之遂幸有身歲中生帝於河南

景帝以孝惠七年生於代宮

武帝以孝景前元年生於長安初帝母王夫人內太

子宮臣欽若等曰太子即景帝也太子幸愛之生三女一男男方

娠夢日入其懷以告太子太子曰是貴徵也遂生武

帝



昭帝以太始三年生於鉤弋宮母曰趙婕妤二字或從女

本以有奇異幸謂望氣者言有奇女天子氣生帝亦奇異十四月乃生

宣帝以征和二年生於太子宮

元帝以元平元年生於長安尚冠里

成帝以甘露三年生於甲觀畫堂甲觀甲乙丙之次也畫堂畫以為飾

哀帝以河平四年生於定陶

平帝以元延四年生於中山

孺子以元始四年生於廣戚

後漢光武以建平元年十二月甲子夜生於濟陽縣

舍有赤光炤室中

明帝以建武四年五月甲申生於嘗山元氏

章帝以中元二年生於雒陽

和帝以建初四年生於雒陽

殤帝以元興元年秋生於雒陽

安帝以永元六年生於清河邸

順帝以元初元年生於雒陽

冲帝以漢安二年生於雒陽

質帝以永和三年生於渤海

桓帝以陽嘉元年生於蠡吾

靈帝以永壽三年生於河間饒陽解瀆亭



弘農王以熹平二年八月丙寅生於雒陽宮

獻帝以光和四年三月癸巳生於雒陽宮帝母王美人初妊娠畏何后服藥欲除之而胎安不動數夢負日而行

魏文帝以後漢中平四年冬生於譙時有雲氣青色而圍如車蓋當其上終日望氣者以爲至貴之證非人臣之氣

高貴鄉公以正始三年九月二十五日生其日天氣晴朗堂上黃雲炤耀久之乃散

晉元帝以咸寧二年生雒陽有神光之異一室盡明

所藉藁如始刈

後魏道武母賀氏因遷徙遊於雲澤寢夢日出室內寤而見光自牖屬天欬然有感以建國三十四年七月七日生帝於叅合陂北其夜復有光明

明元以登國七年生於雲中宮

太武以天賜五年生於東宮

文成以太平真君元年六月生於東宮

獻文以興光元年七月生於陰山之北

孝文以皇興元年八月戊申生於平城宮神光炤室天地氤氲和氣充塞



宣武母高夫人初夢爲日所逐避於牀下日化爲龍繞已數匝寤而驚遂有娠以太和七年閏四月生帝於平城宮

孝明以永平三年三月丙戌生於宣化殿之東北有光炤於庭中

後周太祖母王氏初孕五月夢抱子昇天不至而止寤以告德皇帝太祖父也帝喜曰雖不至天貴亦極矣及

太祖生有黑氣如蓋下覆其身

孝閔帝以西魏大統八年生於同州

明帝以永熙三年生於統萬城

武帝以大統九年生於同州有神光炤室

宣帝以武成元年生於同州

靜帝以建德二年六月生於東宮

隋高祖以西魏大統七年六月癸丑夜生於馮翊般若寺紫氣充庭

唐高祖以後周天和元年十一月丁酉生於長安是日紫氣充庭神光炤室

太宗以隋開皇十八年十二月戊午生於武功之別館時有二龍戲於館門之外三日而去

高宗以貞觀二年六月生於東宮之麗正殿



中宗以顯慶元年十一月乙丑生於長安

睿宗以龍朔二年六月巳未生於長安

玄宗以垂拱元年八月五日生於東都

開元十七年八月癸亥以降誕之日大置酒張樂宴百寮於花萼樓下終宴尚書左丞相源乾曜右丞相張說率文武百官等上表曰臣聞聖人出則日月記其初王澤溥則風俗傳其後故少昊著流虹之感商湯本玄鳥之命孟夏有佛生之供仲春修道祖之錄追始樂原其義一也伏惟開元神武皇帝陛下二氣合神九龍浴聖清明總於玉露爽朗冠於金天月惟

仲秋日在端午嘗星不見之夜祥光炤室之期群臣

相賀曰誕聖之辰也焉可不以為嘉節乎比夫曲水

禊亭重陽射圃五日綵線七夕粉筵豈同年而語也

臣等不勝大願請以八月五日為千秋節

臣欽若等曰誕聖節

名始於此著之甲令布於天下咸令宴樂休假三日群臣

以是日獻甘露醇酎上萬歲壽酒

臣欽若等曰上壽自此始

王公

戚里進金鏡綬帶士庶以絲結承露囊更相遺問村

社作壽酒宴樂名為賽白帝報畀神上明玄天光啓

大聖下彰皇化垂裕無窮異域占風同見美俗帝手

詔報曰凡是節日或以天氣推移或因人事表記八



月五日當朕生辰感先聖之慶靈荷皇天之眷命卿等請為令節上獻嘉名勝地良游清秋高興百穀方熟萬寶以成自我作古舉無越禮朝野同歡是為美事依卿來請宣付所司

十八年六月禮部奏請千秋節休假三日及村閭社會並就千秋節先賽白帝報田祖然後坐飲從之

八月丁亥御花萼樓以千秋節百官獻賀賜四品已上金鏡珠囊繅絲賜五品以下束帛有差上賦八韻

詩又製秋景詩

臣欽若等曰自此已後或連年不書皆史氏闕文

二十三年八月五日千秋節御花萼樓宴群臣御製

千秋節詩序時小旱是日大雨百官等咸上表賀二十四年八月五日千秋節帝御廣達樓宴群臣奏九部樂內出舞人繩伎頒賜有差下制曰自古風俗所傳歲時相樂亦合因事大小在人朕生於仲秋厥日惟五遂為嘉節感慶誠深今屬時和氣清年穀漸熟中外無事朝野乂安不因此時何云燕喜卿等即宜坐飲相與盡歡又召京兆父老等宴之宣勅曰今茲節日穀稼有成頃年以來不及今歲百姓既足朕實多歡故於此時與父老同宴自朝及野福慶同之宜宜坐食食訖樂飲兼賜少物宴訖領取



天寶七載七月文武百官刑部尚書兼京兆尹蕭昭等及宗子咸上表請改千秋節為天長節從之

肅宗以景雲二年九月三日乙亥生於東宮之別殿

祥光炤室至德元年七月卽位二年九月戊寅以降

誕日王公已下咸有進獻帝以行在不受臣欽若等曰時安祿

山盜據兩京故曰行在

乾元元年八月甲辰上皇降誕日於金明樓宴百官

賜綵五百疋二年九月丙寅帝降誕日宴百官於宣

政殿前賜絹三千疋

上元二年九月天成地平節臣欽若等曰史不書置節年月於三殿

置道場

代宗以開元十四年十月十三日生於東都上陽宮

之別殿時玄宗幸汝州之溫陽有望氣者云宮中有

天子氣玄宗卽日還宮是夜帝降誕寶應元年四月

卽位十月宰臣等上言今月十三日皇帝降誕日望

准天長節休假三日帝以山陵未畢不許宰臣又上

言休假一日從之

永泰二年十月降誕日諸道節度使進獻珍玩衣服

名馬二十餘萬計以陳上壽自是歲以為嘗

大曆二年十月降誕日宰臣及嘗叅官率錢修齋度



僧尼道士凡數百人

三年十月降誕日諸道節度使上壽各獻衣服名馬及綾絹凡百餘萬

四年十月降誕日百僚於章敬寺修齋行香陳樂大會

六年十月降誕日脩衆僧齋于資聖寺百僚行香諸道使各獻方物上壽

八年十月降誕日於資聖寺修一千僧齋度僧尼凡二百餘人

九年十月降誕日百僚分寺觀行音頌賜茶藥

德宗以天寶元年四月癸巳生長安東宮別殿大曆十四年五月卽位貞元六年四月乙酉帝降誕日京師諸司百官多於佛寺齋會

十二年四月庚辰帝降誕之日近歲嘗以其日會沙門道士于麟德殿講論帝每謂三教與儒教所歸不殊但內外跡用有異爾是日兼召儒官給事中徐岱兵部郎中趙霈禮部郎中許孟容四門博士韋渠牟與沙門談延道士萬參成等數十人迭昇講坐論三教初如矛戟森然相向後類江河同歸於海帝大悅頒賜有差

是歲昭義節度使王虞休上表曰臣聞於師夫君子爲能知樂是故審音以知聲審



樂以知政則治道備矣清明廣大終始周旋與天地  
 同其和與四時合其序豈止於鐘鼓管磬云乎哉伏  
 見開元天長節著于甲令每于是日海宇懽娛稱萬  
 壽之無疆樂一人之有慶故追堯接舜邁禹踰湯自  
 周已後不能議矣今陛下降誕之辰未有惟新之典  
 無乃臣子之分或有所闕愚臣不揆頑昧敢思祖述  
 之私歌竊忤忘寢與食久矣適遇有知音者與臣論  
 其章樂探微致奧窮理盡情臣乃追造繼天誕聖樂  
 一曲大抵八宮為調表五音之奉君也以土為德知  
 五運之居中也凡二十五篇法二十四氣而足成一  
 歲也每篇一十六拍象八元八愷登庸於朝也冀與  
 雲門咸池永傳於律呂空桑絲竹合薦於宮縣不聞  
 滯滯之聲長作中和之樂可使九方之人頓忘於肉  
 味四夷之俗皆審於薰風與唐惟休終古蓋善臣不  
 勝懇款屏營之至謹昧死陳獻以聞其所造曲譜謹  
 同封進先時有太嘗樂人劉玠流落至潞州虞休因  
 今造誕聖樂  
 起於此也

順宗以上元二年正月十二日生

憲宗以大曆十三年二月十四日生永貞元年八月

即位十二月太嘗奏太上皇正月十二日降誕皇帝

二月十四日降誕竝請休假一日詔可

元和七年二月降誕日宰臣舉舊制例進衣一副李

吉甫獨進馬二匹賜通天犀帶一條金石凌一合

九年二月降誕日御麟德殿垂簾命沙門道士三百

五十人齋會于殿內食畢較論于高座晡而罷頒賜

有差

穆宗以貞元十一年七月六日生於大明宮之別殿

元和十五年正月即位閏正月辛亥太嘗禮院奏准



玄宗降誕爲千秋節  
肅宗降誕爲天成地平節並假一日自後累聖降誕  
雖不別置節名其休假獻餽如舊今皇帝七月六日  
降誕准故事合休假上禮從之

七月乙巳詔曰昔者聖王之法以孝理天下也廣愛  
敬之心推于四海盡奉養之志示于兆人然後自誠  
之化有情思感朕以眇身祇荷鴻業皇太后就安長  
樂朝夕承顏慈訓所加慶感兼極伏以今日六日是  
載誕之辰奉迎皇太后宮中上壽朕旣獲申歡慰亦  
欲公卿大夫同之宜以今日六日平明於光順門集

百寮及外命婦進名賀皇太后朕御光順門內殿與  
百寮相見永爲嘗式又詔御麟德殿觀僧道講論頒  
賜有差先是尚書左丞韋綬以東朝舊恩多所陳奏  
請降誕日詔百官詣光順門先賀皇太后然後上皇  
帝壽書之史册光示萬古帝忻然納焉其後竟以降  
誕受賀禮無所據罷之  
長慶元年七月庚子降誕日百僚於紫宸殿稱賀畢  
詣昭德門外命婦詣光順門並進門奉賀皇太后去  
年降誕稱賀百寮與命婦並集於光順門群情以爲  
非便故改其儀



二年七月甲午降誕日宰臣率百寮入閣奉賀訖又詣光順門進名賀皇太后

敬宗以元和四年六月九日生長慶四年正月卽位四月庚辰朔中書門下奏皇帝六月九日降誕伏准故事休假一日從之其日帝御三殿命浮圖道士講論內官及翰林學士諸軍士駙馬皆從旣罷賞賜有差

寶曆元年六月勅降誕日文武百寮於紫宸殿稱賀及詣光順門奉賀皇太后自今已後宜停國朝本無降誕日賀儀蓋長慶初尚書左丞韋綬率情上疏行此禮至是方罷

二年六月降誕日御三殿命兵部侍郎丁公著太常少卿陸亘前隨州刺史李繁與浮圖道士講論內官翰林學士及諸軍使公主駙馬皆從旣罷賞賜有差文宗以元和四年十月十日生太和元年十月降誕日召秘書監白居易等與僧惟應道士趙常盈於麟德殿講論賜錦綵有差

二年十月壬戌以降誕日召吏部侍郎楊嗣復吏部郎中崔戎等赴麟德殿講論賜錦綵銀器有差四年十月辛亥降誕日命道士僧徒講論于麟德殿



是月鹽鐵使王涯進降誕綾羅錦綵等共一萬四千八百匹銀器一百事判度支王起進綾絹夾纈雜綵等共一萬四千三百匹御衣一副鏡一面諸方鎮稱是

五年十月甲戌降誕日命沙門道士講論于麟德殿七年八月中書門下奏臣聞帝王有必著之符神靈無虛應之兆所以電繞樞極氣感虹流玄鳥祚商赤光啓漢考驗今古章焯圖書伏惟皇帝陛下馭三統之元膺千年之運當誕聖之日爲河清之祥玄律應期乾宮以之定位開冬戒節水德表其靈長道若合

符事光載籍臣等伏見前史稱漢宣之德則曰修武帝故事竝以漢之隆平莫如武帝後之爲理無及孝宣舉此二主以爲極盛今陛下功濟天下道覆寰中威統百靈宰御群品脩祖宗之德莫如貞觀開元且太宗幸慶善之宮卽降誕之所賦詩賜宴播爲樂章玄宗降聖之辰爲千秋之節王公上壽士庶交歡流于管絃書之甲令此時張說宋璟歷艱獻章二臣之心必無違禮國史所載昭然可徵近者廣集緇黃多爲法會誠有資於景福且未叶於舊儀夫四時成歲百穀成實必在首冬用成神化今臣等不勝大願請



以十月十日爲慶成節著在令式以示四方是日陛下於宮中奉迎太皇太后與昆弟諸王盛陳宴樂群臣詣延英門奉觴上千萬歲壽天下州府置宴一日積嘉祚於元命慶延洪於昌期上表中興之耿光次復開元之盛典臣等無任悽悽愾愾之至制曰省表具知朕以誕生之日延集緇黃式遵嘗儀用弘二教卿等啓心輔德叶志納忠稽貞觀開元之舊章述慶善千秋之令範爰崇誕日請號慶成顧予寡昧懼忝彝典今以同歡心於萬國申盛禮於兩宮深嘉誠勤是用依允十月甲午延英對宰臣因謂曰降誕設齋

起自近代朕緣相承已久未可便革雖置齋會唯對

源中等暫入殿

臣欽若等曰源中姓王爲翰林學士

至僧道講論時盡

不臨聽宰臣等奏曰伏以誕聖之辰普天同慶陛下只合侍皇太后與諸王盛陳宴樂以奉慈顏齋會誠資景福且非中國教化伏自開元十七年張說宋璟請以降誕爲千秋節事頗得宜今若修祖宗故事至是日奉迎兩宮太后歡宴實爲盛美帝深然之

八年九月勅慶成節宜令百寮詣延英上壽仍令太嘗寺具儀注聞奏仍准上已重陽例於曲江錫宴九年十月慶成節詔宰臣及文武百官慶成節赴延



英殿庭奉觴稱賀禮畢錫宴於曲江亭

開成元年十月慶成節宴于延英殿太嘗進雲韶樂  
宰臣及翰林學士赴宴又錫百寮宴於曲江

二年九月詔曰慶成節朕之生辰天下賜宴庶同歡  
泰不欲屠宰用表好生非是信尚空門將希無妄之  
福恐中外臣庶不諭朕懷廣置齋筵大集僧衆非獨  
凋耗物力兼恐致惑生靈自今宴會蔬食任陳脯醢  
永爲嘗例咸使聞知又詔慶成節宜令京兆府准上  
巳重陽於曲江宴會文武百寮奉觴宜權停又詔慶  
成節假宜依上元日休假三日十月降誕日帝幸十

六宅與諸王宴樂是日賜宴百寮于曲江

三年十月慶成節命人以酒脯并仙韶樂錫中書  
門下及文武百寮宴於曲江亭

四年十月慶成節宴中書門下及文武百寮於曲江  
亭命人以酒脯及仙韶樂宣錫之

武宗以元和九年六月十一日生開成五年正月卽  
位五月中書奏請以六月十一日帝載誕日爲慶陽  
節從之

會昌元年五月辛未勅慶陽節百官率醢外別賜錢  
三百貫文以素食合宴仍委京兆府量事陳設不用



追集坊市歌舞

宣宗以元和五年六月二十二日生會昌六年三月  
卽位號壽昌節

懿宗以太和七年十一月十四日生大中十三年八  
月卽位號延慶節

僖宗以咸通三年五月八日生於東內十四年七月  
卽位號應天節

昭宗以咸通八年三月二十二日生於長安東內文  
德元年三月卽位龍紀元年三月帝載誕之日宰臣  
等表爲嘉會節從之群臣上表賀曰臣聞聖人受命

天必降其殊靈王者應生國必蒙其介祉故華渚有  
流虹之異玄樞呈大電之祥而皆近感神明遠符乾  
象叶千年而啓運契六合以居尊伏惟皇帝陛下德  
邁方圖道融三五因社鳴而正位逢并聚以樂推膺  
彼昌期弘斯丕構今者發生司律曆數之躬值清明  
馭氣之時當仁壽悅隨之始固可年同鶴算歲比山  
呼永符垂拱之風長保後天之慶

哀帝以景福元年九月三日生天祐元年八月卽位  
其是月中書門下奏皇帝九月三日降誕伏以電曜  
繞樞軒頊乃降天之日光輝焯室明元實命代之辰



爰自我朝乃崇令節著爲故事抑播前文伏惟皇帝  
陛下九五飛龍四三應運國稱利見天表殊休當誕  
聖之時感真人以衛室居在籓之際實羽客以獻符  
是以克紹丕圖光膺寶祚敢循故典爰定美文臣等  
商量以降誕日爲乾和節易曰乾健也蓋乾以自強  
不息和則衆彙皆同遠徵易文實諧聖德請依令式  
休假獻賀從之詔文武百寮諸軍諸使諸道進奉官  
准故事於寺觀設齋不得宰殺只許酒果脯醢  
後唐莊宗以光啓元年十月癸亥生於晉陽宮在妊  
時太后嘗夢神人黑衣擁扇夾侍左右載誕之辰紫

氣出於牕戶同光元年十月壬辰萬壽節百官齋會  
於開封府

二年十月丁亥萬壽節宴群臣於長春殿

三年十月辛巳萬壽節宴長春殿賜百官分物

明宗以咸通八年九月生於代北之金鳳城

天成元年六月中書奏九月九日皇帝降誕之辰舊  
例特置節名以其日爲應聖節休假三日仍令京都  
天下設樂以申祝壽從之

九月九日應聖節百寮於敬愛寺設僧齋召緇黃衆  
於中興殿論難經義



二年九月九日應聖節四方諸侯並有進獻丁巳百官奉爲應聖節於敬愛寺行香設齋宣教坊伎宴樂之宰臣樞密使以下咸進壽酒各賜錦衣召兩街僧道於中興殿講論

三年九月九日應聖節召兩街僧道談經於崇元殿宰相進壽酒百官行香修齋於相國寺宣教坊樂及左右廂百戲以宴樂之又僧道盧受等賜紫衣師號共六十人

四年九月九日應聖節百官於敬愛寺齋設賜宰臣錦袍香囊手帕酒樂帝御廣壽殿近臣獻壽各頒錦

袍復御中興殿聽僧道講論

長興元年九月九日應聖節百官於敬愛寺齋設帝御廣壽殿聽僧道講論

二年九月九日應聖節帝御中興殿觀僧道講論賜物有差

閔帝以天祐十一年十一月二十八日庚申生於晉陽舊第

末帝以光啓元年正月二十三日己卯生於平山清泰元年九月壬申宰臣李愚等奏臣覽國史開元十七年宰臣張說源乾曜奏改朔體元固聖主之能



事良辰嘉會亦俗化之大端蓋周人有合宴之儀漢代有賜酺之律所以歌詠皇德啓迪人情至若泛菊高臺遂號重陽之節流杯曲水永爲上巳之游在昔偶行於今不改豈足比君臨四海運應千年畫瞻圖而敬授民時秉玉燭而節宣和氣身爲律度德合乾坤仰惟樞電之祥最是寰區之樂願從人欲特創節名封函尋示於允俞自此永編於令式舊章斯在列聖嘗行將有擬倫預慙膚淺伏惟皇帝陛下動遵典法克叶祖宗方今玉鏡高懸睿樞廣運告成功於朝社正大禮於宮闈是以舞干率服於三苗班瑞雍熙

於萬國臣等以獻歲元正之月是猗蘭降聖之辰梅花映雪於上林椒酒迎春於祕殿江邊野老願鑿輅之時巡陌上遊童醉堯樽而獻祝謂於是月特舉節名副與人共樂之言致率土交歡之義臣等謹案玄宗皇帝以八月五日載誕張說等請以其日爲千秋節臣等不揆庸暗輒體憲章請以來年正月降聖日爲千春節從之

二年正月乙巳中書門下奏遇千春節凡刑獄公事奏覆候次月施行今後請重繫者卽俟次月輕繫者卽誕聖節前奏覆決遣從之戊戌於佛寺供僧張樂



甲子宴群臣於長春殿

晉高祖以唐景福元年二月二十八日生於太原汾陽里時有白氣充庭

天福元年十二月宰臣馮道等奏曰臣聞惟睿作聖千年乃契於貞期大德曰生萬國咸思於令節將詮懿號仰慶休辰傾心未出於嘗名近意有塵於嘉會伏惟皇帝陛下應天順人握圖御寓拯寰瀛於否極俾動植以泰來允符鳴社之祥方顯繞樞之瑞而况斗柄正卯律吹仲春當帝王出震之方是天地同和之月斯辰誕聖衆靈咸歸顧前代而罕同在舊章而

宜舉垂諸不朽簡編既溢於徽猷必也正名稱謂須符於景貺伏願以來年二月二十八日爲天和節庶夫觴稱萬壽稍申將順之心節配四時永洽好生之德從之

二年二月辛亥天和節帝御長春殿召左右街僧錄威儀入內談經

十月兩浙錢元瓘進天和節大排方龍座金腰帶一御衣十二事

三年二月乙巳天和節岳牧玉帛皆至是日宴近臣於廣政殿召僧道講論各賜有差



四年二月庚子以天和節宴群臣於廣政殿賜物有差

臣欽若等曰五年事史臣不書

六年二月戊午天和節宴群臣於廣政殿賜道釋紫衣師號并寺額

十月福州進天和節銀一千兩

七年二月壬子天和節帝御武德殿宰臣率文武百官上壽如儀退就佛寺行香宴樂而罷其年詔天下郡縣不得以天和節禁屠宰輒滯刑獄

少帝以天祐十一年六月二十七日生於太原汾陽里天福七年六月卽位八年六月宰臣馮道以誕辰

率文武百官上表曰臣等聞大電繞樞哲后繼犧農之運五星聚井真人啓文景之基昌圖允洽於千年嘉號空光於載誕不有稱述曷顯休明伏惟皇帝陛下土律調元金華啓旦上帝錫九齡之夢道人聞下武之詩德協無爲民知有慶當大雨時行之日乃嘗星不見之辰將歡寓縣之心竊效華封之祝臣等不勝大願望以六月二十七日爲啓聖節著于甲令告彼萬方使地角天涯望南山而祝壽九州四海仰北極以傾心誠乖致主之功輒敢稱君之美從之

漢高祖以唐乾寧二年二月四日生於太原以晉開



運四年卽位於太原宮復稱天福十二年是年八月文武百寮上表請以二月四日降誕日爲聖壽節從之

隱帝以唐長興二年三月九日生於鄴都之舊第乾祐元年十二月辛卯百寮上表曰色變長瀾肇皇靈之寶構光流華渚開聖緒於瑤圖莫不慶洽同文光昭大象刻玉波汾於鳳紀鳴金颺振於洪猷所以顛氣凝空編爲令典神光燭夜允叶昌期皇帝陛下守位以仁繼明以德化敷有感慶洽無疆當九龍洽聖之辰是五緯聯光之夕凡蒙地載共祝天長皇帝三

月九日誕聖請以其日爲嘉慶節休假三日群臣宴樂上壽從之

二年三月壬子嘉慶節群臣詣佛寺齋設祝壽

三年三月丙子嘉慶節御廣政殿文武百寮上壽酒初舉樂將相大臣獻金寶鞍馬爲壽禮畢群臣入相國寺齋設賜教坊樂

周太祖以唐天祐甲子歲七月二十八日庚寅之夕生於堯山之舊宅載誕之夕赤光炤室初有聲如爐炭之裂星火四迸母王氏懼戒使者曰勿外言

廣順元年六月甲午宰臣率百官上表曰恭以少昊



乘乾曳祥虹於華渚軒轅出震流瑞電於樞星所以  
玉牒表天地之禎金策纂皇王之異仰惟聖德允叶  
昌期伏惟聖帝陛下德輝三五道煥古今開階成周  
室之昌啓運得堯基之典豈可使方濁澄明之狀未  
顯洪名圖清燦爛之文不章懿號臣等傾誠紫禁都  
慶丹丘願隆百代之基奠正萬年之祚臣等請以七  
月二十八日皇帝降聖日爲永壽節群臣上壽內外  
宴樂從之

七月戊子永壽節帝御廣政殿百寮進酒上壽班退  
賜衣服分物有差群臣赴相國寺齋設

二年四月癸丑勅永壽節每年諸道節度防禦團練  
等使刺史奏薦僧尼道士紫衣師號等今後見任節  
度使帶使相僧尼道士紫衣師號可共奏三人見任  
節度使不帶使相共二人見任防禦團練刺史等祇  
奏一人在朝文武臣寮及前任官今後更不得奏薦  
七月丙辰勅内外文武臣寮遇永壽節辰皆於寺觀  
起置道場便爲齋供訪聞皆是率醮不唯牽費兼且  
勞煩念忠節以可嘉在誠抱而增愧所宜減損以便  
公私今後中書門下與文武百寮共設一齋樞密使  
與內諸司使副使等共設一齋侍衛親軍馬步都指



揮使已下共設一齋其餘前任官員及諸司職掌並不得更請開置道場及設齋

壬午永壽節群臣詣廣政殿上壽畢赴相國寺齋設宰臣學士內諸司使前任節度使防禦團練等士侍御諸軍都將刺史等賜衣各一襲

三年七月京城居民晁緒等言以永壽節各於門首齋燃燈三晝夜從之乙巳永壽節太祖御永福殿群臣上壽賜將相大臣禁軍大將等衣有差群臣赴僧寺齋會

世宗以唐天祐十八年九月二十四日丙午生於邢

臺之別墅

顯德元年七月壬辰文武百寮上表曰伏以壽丘降跡爰符出震之期里社應祥式契乘乾之運頃觀舊史柳有藝章幸當載誕之辰仰奉延洪之稱伏惟皇帝陛下道超九聖祚啓千齡紹文武之耿光比成康之迪哲自登天寶益顯聖功運龍韜而親御戎車仗金鉞而立平賊寇破幽弁之妖孽救澤潞之生靈觀兵而直抵晉陽奮武而遠臨代北元兇假息雜虜摧鋒還京闕而契人心謁園陵而伸孝道飲至纔踰於旬日覃恩已被於八方四塞關山漸息煙塵之警萬



邦臣妾咸登仁壽之鄉今則候屬澄河時當降聖是  
甲觀懸弧之日乃銅律禦戶之時鰈水鷄林望堯雲  
而獻祝桓圭穀璧趨禹會以駿奔臣等叨遇休明俱  
塵祿位荷君父巍巍之德伸臣子悽悽之誠祇率典  
謨尊奉宸極臣等不勝大願謹以九月二十四日降  
誕日奉上節名爲天清節所冀金相玉振貞寶曆以  
彌新地久天長煥青編而不朽從之

九月乙未天清節帝御廣政殿宰臣率文武百寮上  
壽如儀頒賚有差

二年九月己丑天清節帝御廣政殿文武百寮上壽  
三年九月癸丑天清節賜文武臣寮衣有差宰臣率  
百官詣廣政殿上壽如儀

四年九月丁未天清節百辟上壽如儀賜內外臣寮  
衣有差

五年九月壬子天清節賜文武臣寮衣有差旣而詣  
廣德殿上壽江南進奉使商崇義代李景捧壽觴以  
獻旣罷百官詣相國寺修齋

恭帝以廣順三年八月四日生於澶州之府第顯德  
六年卽位其年文武臣寮上表請以八月四日爲天  
壽節從之



冊府元龜 誕聖

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

三

名諱

周官小史掌王之名諱名諱之起繇周道也上古帝王敦尚質樸名號雖建制度未備故堯舜則有放勛重華之名而禹湯又去唐虞之文從高陽之質以名為號先儒之說或以為名或以為字或以為謚而尚



書所紀即皆褒德之稱蓋傳述之異也自漢已來所記詳矣至若貴易諱而難知避五行之勝伏亦皆有旨焉

黃帝名曰軒轅蓋受國於有熊居軒轅之丘因以為名又以為號又云作軒冕之服故謂之軒轅

少昊名摯字青陽

顓頊高陽

帝嚳高辛

高陽高辛皆所興之地名顓頊與嚳皆以字為號上古質故也

帝摯

帝堯名放勳

帝舜名重華

夏禹名文命

帝啓

帝太康

帝仲康

帝相

帝少康

帝寧

一作杼

帝槐

帝芒



帝泄

帝不降

帝扃

帝厯

帝孔甲

帝皐

帝發

帝履癸是為桀

殷湯名履字天乙

帝外丙

帝仲壬

帝太甲

帝沃丁

帝太康

帝小甲

帝雍巳

帝太戊

帝仲丁

帝外壬

帝河亶甲



帝祖乙

帝祖辛

帝沃甲

帝祖丁

帝南庚

帝陽甲

帝盤庚

帝小辛

帝小乙

帝武丁

帝祖庚

帝祖甲

一作帝甲

帝廩辛

帝庚丁

帝武乙

帝太丁

帝乙

帝辛是為紂

周文王昌

武王發



成王誦

康王釗

昭王瑕

穆王滿

恭王瓘扈

一作伊扈

懿王囂

一作囂

孝王辟方

一单名方

夷王燹

厲王胡

宣王靜

幽王宮涅

平王宜臼

桓王林

莊王佗

釐王胡齊

惠王閔

襄王鄭

頃王壬臣

匡王班

定王瑜



簡王夷

靈王泄心

景王貴

悼王猛

敬王丐

元王仁

一日赤元王

定王介

一日具定王

哀王去病

思王叔

考王嵬

威烈王午

安王驕

烈王喜

顯王扁

慎靚王定

赧王延

漢高祖皇帝諱邦字季邦之字曰國臣下所避以相代也

惠帝諱盈之字曰滿

文帝諱恒之字曰嘗



景帝諱啓之字曰開

武帝諱徹之字曰通

昌邑王諱賀

臣欽若等曰史氏不載其諱字

昭帝諱弗之字曰不帝初為皇太子名弗陵後但名弗以二名難諱也

宣帝諱詢字次卿詢之字曰謀帝初名病已蓋以夙遭屯難而多病故名之欲其速差也元康二年詔曰聞古天子之名難知而易諱也今百姓多上書觸諱以犯罪者朕甚憐之其更諱詢諸觸諱在令前者赦之

元帝諱奭之字曰盛

成帝諱騫之字曰俊帝初生于太子宫為世嫡皇孫

宣帝愛之字曰太孫

哀帝諱欣之字曰喜

平帝諱衍之字曰樂帝初名箕子元始二年詔曰皇

帝二名通於器物

箕用器也故云通于器物

今更名合於古制使

太師光奉太牢告祠高廟

後漢光武皇帝諱秀字文叔秀之字曰茂初光武生

濟陽縣舍是歲縣界有嘉禾生一莖九穗因名曰秀

明帝諱莊之字曰嚴



章帝諱炆丁達切之字曰著

和帝諱肇之字曰始

殤帝諱隆之字曰盛改河内隆慮為林慮

安帝諱佑之字曰福

順帝諱保之字曰守

冲帝諱炳之字曰明

質帝諱續之字曰繼

桓帝諱志之字曰意

靈帝諱宏之字曰大

獻帝諱協字伯和協之字曰合靈帝以帝似已故名之

魏文帝諱丕字子桓

明帝諱獻字元仲

齊王諱芳字蘭卿

高貴鄉公諱髦字彥士

陳留王諱奐字景明初為嘗道鄉公名璜甘露五年

五月己丑高貴鄉公卒皇太后立之詔曰古者人君

之為名字難犯而易諱今嘗道鄉公諱字甚難避其

令朝臣博議改易列奏遂改之

晉武帝諱炎字安世

惠帝諱衷字正度



懷帝諱熾字豐美

愍帝諱鄴字彥旗建興元年即位改建鄴為建康改鄴為臨漳

元帝諱睿字景文

明帝諱紹字道畿

成帝諱衍字世根

康帝諱岳字世同

穆帝諱暕字彭子

哀帝諱丕字千齡

簡文帝諱昱字道萬

孝武帝諱曜字昌明

安帝諱德宗字德宗

恭帝諱德文字德文

後魏道武帝諱珪

明元帝諱嗣

太武帝諱燾

文成帝諱濬

獻文帝諱弘

孝文帝諱宏

宣武帝諱恪



孝明帝諱詡

孝莊帝諱子攸

前廢帝

亦曰節閔

諱恭字修業

後廢帝諱朗字仲哲

孝武帝

亦曰出帝

諱循字孝則

西魏文帝諱寶炬

廢帝諱欽

恭帝諱廓

後周愍帝諱覺字陀羅尼

明帝諱毓小名統萬突太祖長子太祖臨夏州生帝

統萬城因以名焉

武帝諱邕字禰羅突

宣帝諱贇

靜帝諱闡初名衍

隋高祖諱堅小名那邏延

煬帝諱廣一名英小字阿廢長壽元年立為皇太子

改廣川縣為長河縣

恭帝諱侑

唐高祖諱淵

太宗諱世民幼時有相者云未年二十當濟世安民



高祖以爲神陰採濟世安民之義遂以名焉武德九年立爲皇太子令曰依禮二名義不偏諱尼父達聖非無前指近代以來曲爲節制兩字兼避廢闕已多率意而行有違經誥今宜依據禮典務從簡約仰效先哲垂法將來其官號人名及公私文籍有世及民兩字不連讀者竝不須避至高宗卽位乃改民部爲戶部以避之

高宗諱治卽位初有司請改治書侍御史爲御史中丞諸州治中爲司馬治禮郎爲奉禮郎帝以貞觀時不廢先帝二字不許有司奏曰先帝二名禮不偏諱上旣單名臣子不敢指斥從之

顯慶五年正月壬寅詔曰孔宣設教正名爲首戴聖貽範嫌名不諱比見鈔寫古典至於朕名或缺其點畫或隨便改換恐六籍雅言會意多爽九流通義指事全違誠非立書之本意自今以後繕寫舊典文字竝宜使成不須隨義改易

中宗諱顯儀鳳二年十月封英王改名哲聖曆元年册爲皇太子復名顯神龍元年正月卽位改顯政殿爲昭慶殿顯德殿爲章德殿顯聖侯廟爲昭聖侯廟睿宗諱旦初名旭輪總章二年封冀王單名輪永淳



三年始改名且

玄宗諱隆基先天二年正月詔改隆州為閬州自餘州縣等名有與皇帝名同者便令所司改定至寶曆元年正月太嘗寺禮院上言玄宗廟諱准故事祧遷後不當更諱制可之

肅宗諱亨初名嗣昇開元十五年改名浚二十三年改名輿二十八年改名紹有獻書者言宋太子名邵惡其聲類天寶三載又改名亨

代宗諱豫初名俶乾元元年十月立為皇太子因降誕日豫州奏百姓李氏有嘉禾生及是册禮肅宗詔

改名豫寶應元年即位改豫州為蔡州泗州宿豫縣

改為宿遷縣兗州方與縣改為魚臺縣洪州豫章縣

改為鍾陵縣豫寧縣改為武寧縣古州樂豫縣改為

樂山縣

德宗諱适大曆十四年即位改括州為處州括蒼縣

為麗水縣

順宗諱誦憲宗元和二年八月刑部奏改律卷第八

為鬪競律

咸通十二年分司侍御史李谿進狀曰臣准西臺牒及金部稱奉六月二十七日勅

內園院郝景全事奏狀內訟字音與廟諱同奉勅罰臣一季俸者右臣官位至卑得蒙罰俸屈與不屈不合有以事至分明別關理體若便隱默恐負聖時願陛下寬其罪戾使得盡言臣前奏狀稱准勅因事告



事旁訟他人是咸通十一年十月十三日勅語臣狀  
 中具有在勅字非臣自撰辭句臣謹按禮不諱嫌名  
 又按職制律諸犯廟諱嫌名不坐注云謂若禹與雨  
 疏云謂聲同而字異注疏重復至易分曉伏惟睿文  
 英武明德至仁大聖廣孝皇帝陛下明過帝堯孝踰  
 大舜豈自發制勅而不避諱哉故是審量禮律以為  
 無妨耳即引陛下勅文而言不敢擅有移改不謂內  
 園使有此論奏也臣之罰俸實為小屈然今者非敢  
 訴此罰俸也實以從來制勅及百官表奏曾有避嫌  
 各例而因臣致罰即舊章自此有援引勅格者亦須  
 委曲迴避便成訛弊臣今已罰俸不合上聞臣聞趙  
 充國為將不嫌伐一時事以為漢家後法魏徵為相  
 不存形迹以致貞觀太平臣雖未及將相忝為陛下  
 持憲之臣豈可以論俸為嫌而使國家勅命有誤也  
 且順宗廟諱萬國儀刑誠不可同於小事願陛下留  
 意察納別下明勅使自後章奏遵禮律處分則天下  
 幸甚勅尋  
 免所罰

憲宗諱純初名淳貞元二十一年冊為皇太子始更

之永貞元年即位改桂州純化縣為慕化縣蒙州純  
 義縣為正義縣又改淳州為睦州還淳縣為清溪縣  
 橫州淳風縣為從化縣淳于姓改為于以音與帝同  
 名故也古者不諱嫌名禹與兩丘與蒞臨文不諱文  
 王名昌武王名發周詩曰克昌厥後又曰一之日臧  
 發魯莊公名同春秋曰同盟于幽襄公名午書曰陳  
 侯午卒之類是也古今時變故廣避焉  
 穆宗諱同于真宗初名宥元和七年立為皇太子始更之  
 十五年即位改嘗岳為鎮岳嘗州為鎮州定州嘗陽  
 縣為曲陽縣嘗王房子孫為泚王房



敬宗諱湛

文宗諱昂初名涵卽位更之

武宗諱炎初名灑會昌六年三月制曰王者炤臨萬  
寓名豈尚于難知敬順五行理宐避于勝伏徵諸前  
史義實炳然昔炎漢之興雒傍去水所都名號猶乃  
避之况我國家祚昌土德豈可以王氣勝于君名所  
以憲宗繼明之初貴以捨水必有冥數協于禎祥漢  
宣帝柔服北夷弘其祖業功德之盛侔於周宣御曆  
十年乃從美稱朕遠追大漢之事近稟聖祖之謀爰  
擇嘉名式遵令典庶承天意永保鴻休宐改名爲炎

仍令所司擇日分命宰臣告天地宗廟其舊名中外  
奏章不得更有迴避告報遐邇咸遂聞知

宣宗諱忱初名怡卽位更之

懿宗諱漼初名溫大中十三年八月立爲皇太子始  
更之

僖宗諱儇初封晉王名儼咸通十四年七月立爲皇  
太子乃更之

昭宗諱敏初名傑龍紀元年十一月辛亥將有事於  
圓丘始更之

哀帝諱祝初封輝王名祚天祐元年八月立爲皇太



子監國乃更之卽位先是太嘗寺有止鼓兩字樂器上字犯御名中書門下奏臣等謹按故事漢室以北山改郡蓋爲文皇國朝以復姓稱子實緣憲祖或易建康之縣或更昭穆之音皆因踐祚之初合舉避行之典按爾雅釋樂篇鼓謂之止敵謂之篥今者陛下肇承丕祚始值遷都凡厥惟新式叶正始竊詳爾雅肇亦訓始臣等商量望改爲肇從之

後唐莊宗諱存勗

明宗諱亶初名嗣源天成元年六月勅曰古者酌禮以制名懼廢於物難犯而易避貴便於時况徵彼二名抑有前例以太宗文皇帝自登寶位不改舊稱時卽臣有世南官有民部靡聞曲避止禁連呼朕猥以眇躬託于人上止遵聖範非敢自尊應文書內所有二字但不連稱不得迴避如是臣下之名不欲與君親同字者任自改更務從私便庶體朕懷

二年正月制曰王者祇敬宗祧統臨寰宇必順體元之典特新制義之文朕以眇躬獲承丕構襲三百年之休運繼二十聖之耿光馭朽納隍夕惕之心罔怠法天師古日躋之道惟勤今則載戢干戈混同書軌荷玄穹之睠佑契兆庶之樂推簡玉泥金非敢期於



薄德耕田鑿井誠有慕於前王將陳享謁之儀即備郊丘之禮宜更稱謂永耀簡編今改為宜凡在中外

宜體朕懷宣記百寮稱賀兼差官告郊廟社稷清泰二年

五月中書門下奏准天成元年正月十六日勅本朝列聖及四廟諱近日中外表疏偏旁文字皆闕點畫凡當出諱止避正呼儻迴避於偏旁則虧闕於文字宜從朴素庶便公私凡廟諱但迴避正文其偏旁文字不在減少點畫今定州節度使楊壇檀州金壇縣等名酌情制義竝請改之其表章文案偏旁字闕點畫凡臣寮名涉偏旁亦請改之詔曰偏旁文字音韻懸殊止避正呼不空全改楊壇宜賜名光遠其餘依奏

愍帝諱從厚小字菩薩奴

末帝諱從珂清泰二年中書言御名上一字與諸王

相連太宗玄宗故事人臣諸王合避相聯字單名從之

晉高祖諱敬瑭少帝天福七年勅應殿名及州縣名職名等有與高祖諱犯者悉改之明堂為宣德殿唐州為沁州思唐州為思化州密州附唐縣為膠西縣蔚州興唐縣為靈山縣博州堂邑為河濱高唐為濟城定州唐縣為博陵莫州唐興為宜州真定府行唐為永昌堂陽為蒲澤彭州唐化為彭山蜀州唐興為鄉城道州延唐為延喜福州福唐為南臺壽州盛唐為來化鄂州唐年為臨江杭州錢唐為錢江山為



橫山台州唐興爲台興隨州唐城爲漢東代州唐林  
爲廣武漢州金堂爲漢城合州石鏡爲仙覽復州竟  
陵爲景陵中書政事堂爲廳堂後官諸房頭爲錄事  
餘竝爲主事所有諸邑人姓名犯者竝改又改陝府  
甘棠驛爲通津驛

少帝諱重榮

漢高祖本名知遠卽位初前邠州節度使折從遠改  
名從阮

乾祐元年勅曰朕祇膺景命肇啓鴻圖適當建號之  
初宜舉正名之典夫名以制義義以出禮禮以體政

政以養民載考格言抑有彝訓顧性寡昧敢忘率循  
但君父之名貴於易避臣子之敬難以斥尊苟觸類  
以妨言必迂文而害理况宗廟方建禋祀匪遙祝嘏  
將期於正辭稱謂所宜於稽古爰從改革庶叶典章  
凡百臣寮當體朕意今改名嵩故茲札示想宜知悉  
少帝諱承祐

周太祖諱威廣順元年正月卽位相州張彥成澶州  
李洪義侍衛步軍指揮使曹英前陳州刺史馬令琮  
慶州刺史郭彥欽皆以名下一字與御名同改爲成  
義英琮欽



二月涇州節度使史康懿言臣名下一字與御名同改之

三月詔鄧州軍額改為武勝軍靈武屬郡宜改為環州避御名也

八月環州刺史雷彥洪以名下一字犯御名改之

十二月御史臺奏唐景雲三年改左右屯衛大將軍為威衛又唐高宗名治其時改治書御史為御史中丞諸州治中為司馬蓋臣子上書合避名也請諸衛中舊是屯衛者復舊名從之

世宗諱榮

尾

冊府元龜

淮南李嗣京參閱

西極文翔鳳訂正

豫章黃國琦較釋

帝王部 四

運歷

昔鄭子述五代之官紀蓋有倫矣稽之於易本其世數乃知庖犧之王正得天統其工繼起位非其序少昊之衰九黎亂德顓頊始復建重黎之官以司天地其後三苗干紀二官咸廢堯命羲和以纂其業授時

冊府元龜

帝王部

卷之四



定歲衆功，治既而授舜曰：天之曆數在爾躬，舜亦以命禹。三代之際，牲服殊典，漢紹周世，議論累葉，訖於中興，始定厥制。魏晉而下，南北迭起，而天祿永終，實在中夏。至或徵諸儒之說，集盈庭之言，敷引異轍，訟襲相戾，及夫循五德終始之傳，叶三統因革之義，頌正朔立制度，咸推歷而更王，居正而惟敘者矣。太昊帝庖犧氏繼天而王，為百王先首，德始於木，故為太昊帝。炎帝神農氏繼庖犧氏以火，承木故為炎帝。黃帝軒轅氏繼神農氏以火生土，故為土德。

少昊氏黃帝之子青陽也，是其子孫名摯，立土生金，故為金德，天下號曰金天氏。

顓頊高陽氏繼少昊氏，金生水，故為水德，天下號曰高陽氏。

帝嚳高辛氏，青陽玄囂之孫也，繼高陽氏，水生木，故為木德。

帝堯陶唐氏，封於唐，蓋高辛氏衰，天下歸之，木生火，故為火德。

帝舜有虞氏，堯禪以天下。禮曰：禪讓字也。火生土，故為土德。伯禹夏后氏，虞舜嬪以天下，土生金，故為金德，故夏



后氏尚黑 以建寅之月為正物生黑色 戎事乘驪 戎兵也馬黑色曰驪爾雅曰駉

牝驪 牲用玄 玄黑類也

湯伐桀踐天子位乃改正朔服色尚白朝會以畫金

生水故為水德天下號曰商後曰殷 初契封商湯居殷而受命故二

號故殷人尚白 以建丑之月為正物萌白色 戎事乘翰 翰白馬也 牲用

白

周武王伐紂踐天子位水生木故為木德號曰周室

故周人尚赤 以建子之月為正物萌色赤 戎事乘騶 騶驪馬白腹 牲用

騂 騂赤類

烈王二年周太史儋見秦獻公曰始周與秦國合合

而別別五百載復合 周孝王封伯翳之後為侯伯與周別五百載至昭王時西周君

臣自歸受罪獻其邑三十六城合也謂從秦仲至孝公強大顯王致霸與之親合也 合十七歲

而霸王者出焉 從此後十七年而秦昭王立武王昭王皆霸至始皇而王天下

漢高祖起沛旗幟皆赤繇所殺蛇白帝子所殺者赤

帝子故也既代秦繼周木生火故為火德

文帝時魯人公孫臣上書曰始秦得水及漢受之推

終始傳則漢當土德土德之應黃龍見宜改正朔服

色上黃時丞相張蒼好律曆以為漢乃水德是時河

決金隄其符也年始冬十月色外黑內赤 十月陰氣在外故外

黑陽氣尚伏在地故內赤也 與德相應公孫臣言非 或曰十月百草外黑內赤也



是罷之明年黃龍見成紀天水之縣也文帝召公孫臣拜

為博士與諸生申明土德草改歷服色事自漢興之

初庶事草創唯一叔孫生略定朝廷之儀若乃正朔

服色郊望之事數世猶未章焉至於孝文始以夏郊

而張蒼據水德公孫臣賈誼更以為土德卒不能明

武帝太初元年五月正曆以正月為歲首色尚黃數

用五倪寬司馬遷等猶從臣諡之言公孫臣賈誼服色數

度遂順黃德彼以五德之傳從所不勝五帝相承代

火相勝之法若火滅金便以火代金秦在水德故謂漢據土而克之劉

向父子以為帝出于震故也犧氏始受木德其後以

母傳子終則復始自神農黃帝下歷唐虞三代而漢

得火焉故高祖始起神母夜號著赤帝之符旗章遂

赤自得天統矣向父子雖有此議時不施行至光武乃用火德耳

後漢光武建武二年正月始正火德色尚赤漢初土德色尚

黃至此始明火德旗幟尚赤服色於是乃正

魏文帝以漢延康元年十一月受禪給事中博士蘇

林董巴上表曰魏之氏族出自顓頊與舜同祖舜以

土德承堯之火今魏亦以土德承漢之火於行運合

於堯舜授受之次遂改延康元年為黃初元年議改

正朔易服色殊徽號承土行十二月幸雒陽以夏數



得天故卽用夏正而服色尚黃又詔以漢火行也火忌水故雒去水而加雒魏於行次爲土土水之壯也水得上而乃流土得水而柔故除雒加水變雒爲洛明帝景初元年春正月壬辰山荏縣言黃龍見於是

有司奏以爲魏得地統宐以建丑之月爲正三月定曆改年爲孟夏四月

初文皇帝卽位以受禪於漢因循漢正朔弗改帝在東宮著論

以爲五帝三王禮不相襲正朔自宐改變以明受命之運及卽位優游者久之史官復著言宐改乃詔三公特進九卿中郎將大夫博士議郎千石六百石博士議議者或不同帝據古典甲子詔曰夫太極運三辰五星於上元氣轉三統五行於下登降周旋終則又始故仲尼作春秋三微之月每月稱王以明三正迭相爲首今推三統之次魏得地統宐以建丑之月爲正月考之洪範歷義章矣其改青龍五年三月爲景

初元年 四月 服色尚黃犧牲用白戎事乘黑首白馬建太

赤之旂朝會建大白之旂改太和曆曰景初曆其春夏秋冬孟仲季月雖與正歲不同至於郊祀迎氣酌

祀蒸嘗巡狩蒐田分至啓閉班宣時令中氣早晚敬

授民事皆以正歲斗建爲曆數之序 初高堂隆以爲改正朔易服色

殊徽號異器械自古帝王所以神明其政變民耳目故三春稱王明三統也於是敷演舊章奏而改焉帝從其議改青龍五年春三月爲景初元年 孟夏四月服色尚黃犧牲用白從地正也

齊王芳以景初三年卽位十二月詔曰烈祖皇帝以

正月棄背天下臣子永惟忌日之哀其復用夏正雖

違先帝通三統之義斯亦禮制所繇變改也又夏正



於數為得天正其以建寅之月為正始元年正月以建丑月為後十二月

晉武帝以太始元年即位二年九月群公奏唐堯舜禹不以易祚改制至於湯武各推行數宣尼答為邦之問則曰行夏之時輅冕之制通為百代之言蓋期於從政濟治不繫於行運也今大晉繼三皇之蹤踵舜禹之迹應天從民受禪有魏宜一用前代正朔服色皆如有虞遵唐故事於義為弘奏可

史臣曰晉為赤考之天道其違甚矣

史臣曰晉為金行服色尚

元帝以丁丑歲稱晉王置宗廟使郭璞筮之云享二

百年自丁丑至禪代之歲年在唐申為一百四歲然

丁丑始係西晉庚申終入宋年所餘惟一百有二歲

耳璞蓋以百二之期促故婉而倒之為二百也

習鑿齒臨

終上疏曰臣每謂皇晉宜越魏繼漢不應以魏後為三恪而身微官卑無繇上達懷抱愚情三十餘年今沉淪重疾性命難保遂長懷此當與之朽爛區區之情切所悼惜謹力疾著論一篇寫上如左願陛下考尋古義求經嘗之表超然遠覽不以臣微賤廢言其所論曰或問魏武帝功蓋中夏文帝受禪於漢而吾子謂漢終有晉豈實理乎且魏之見廢晉道亦病晉之臣子寧可以同此言哉答曰此乃所以尊晉也但絕節赴曲非嘗所悲見殊心異雖奇莫察請為子言焉昔漢氏失御九州殘隔三國乘間鼎峙數世干戈日尋流血百載雖各有偏平而其實亂也宣皇帝勢逼當年力制魏氏屢屈從時遂羈戎後晦明掩耀龍潛下位俛首重足鞠躬屏息道有不容之難躬蹈履霜之險可謂危矣魏武既亡大難獲免始南擒孟達



東蕩海隅西抑勁蜀旋撫諸夏推吳人入侵之鋒掃  
 曹爽見忌之黨植靈根以跨中嶽嶽群才以翼子弟  
 命世之志既恢非嘗之業亦固景文繼之靈武冠世  
 剋伐貳違以定厥庸席卷累益奄征西極功格皇天  
 勳侔古烈豐規顯祚故以灼如也至於武皇遂弁疆  
 吳混一宇宙又清四海同軌二漢除三國之大害靜  
 漢末之交爭開九域之蒙晦定千載之盛功者皆司  
 馬氏也而推魏繼漢以晉承魏比義唐虞自託純臣  
 豈不惜哉今若以魏有代王之德則其道不足有靜  
 亂之功則孫劉鼎立道不足則不可謂制當年當年  
 不制於魏則魏未嘗為天下之主王道不足於曹則  
 曹未始為一日之王矣昔共工霸有九州秦政奄平  
 區夏鞭撻華戎專總六合猶不見序於帝王淪沒於  
 戰國何况暫制數州之人威行境內而已便可推為  
 一代者乎苟以晉嘗事魏懼傷皇德拘惜禪名謂不  
 可割則感之甚者也何者魏懼傷皇德拘惜禪名謂不  
 之人雖服其後取之大義於彼何有且吳楚爭號周  
 室未亡子文延陵不見貶絕宣皇帝官魏逼於性命  
 舉非擇木何虧德美禪代之義不同堯舜較實定名  
 必彰於後人各有心事胡可掩定空虛之魏以屈於

已孰若仗義而以貶魏哉夫命世之人正情遇物假  
 之際會必兼義勇宣皇祖考立功于漢世篤爾勞思  
 報亦浮魏武超越志在傾主德不素積義險水薄宜  
 帝與之情將何重雖形屈當年意申百世降心全已  
 憤慨於下非道服北面有純臣之節畢命曹氏忘濟  
 世之功者也夫成業者係於所為不係所藉立功者  
 言其所濟不言所起是故漢高稟命於懷王劉氏乘  
 斃於亡秦超二偽以遠嗣不論近而計功考五德於  
 帝典不疑道於力政季無承楚之號漢有繼周之業  
 取之既美而已德亦重故也凡天下事有可借喻於  
 古以曉於今定之往昔而足為來證者當陽秋之時  
 吳楚二國皆僭號之王也若使楚莊推鄢郢以尊有  
 德闔閭舉三江以奉命世世之君有德之主或藉  
 之以應天或撫之而光宅彼必自係於周室不推吳  
 楚以為代明矣况積勳累功靜亂寧眾數之所錄眾  
 之所與不資於燕噲之授不賴於因藉之力長轡廟  
 堂吳蜀兩斃運奇二紀而平定天下服魏武之所不  
 能臣蕩累葉之所不能除者哉自漢末鼎沸五六十年  
 年吳魏犯順而強蜀人仗正而弱三家不能相一萬  
 姓曠而無王夫有定天下之大功為天下之所推孰



如見推於闡人受尊於微弱配天而為帝方駕於三代豈比俛首於曹氏側足於不正即情而恒實取之而無慙何與詭事而託偽開亂於將來者乎是故故舊之恩可封魏後三恪之數不空見列以晉承漢功實顯然正名當事情體亦厭又何為虛尊不正之魏而虧我道于大通哉昔周人詠祖宗之德追述剪商之功仲尼明大孝之道高稱配天之義然后稷勤於所職聿來未以翦商異於司馬氏仕乎曹族三宗之寓於魏世矣且夫魏自君之道不正則三祖臣魏之義未盡義未盡故假塗以運高略道不正故君臣之節有殊然則弘道不以輔魏而無逆取之嫌高拱不勞汗馬而有靜亂之功者蓋勳足以王四海義可以登天位雖我德慙於有周而彼道異於殷商故也今子不疑其工之不得列於帝王不嫌漢之係周而不係秦何至於一魏猶疑滯而不化哉夫欲尊其君而不知推之於堯舜之道欲重其國而反厝之於不勝之地豈君子之高義若

猶未悟請於是止矣  
後魏道興元年十二月詔百司議定行次尚書崔玄

伯等奏從土德服色尚黃數用五祖辰臘犧牲用白

五郊立氣宣贊時令敬授民時行夏之正

時有司奏國家繼黃

帝之後宜為土德故神獸如牛牛上畜又黃色顯曜其符也於是始從土德天興中李先之子密問於先

日子今為魏臣將復事他主也先告曰未也國家政化長遠不可卒窮自始皇至齊受禪實五百餘載矣

孝文太和十四年八月詔曰丘澤初制配尚宜定五德相襲分敘有嘗然異同之論著於往漢未詳之說疑在今史群官百辟可議其所應必令合衷以成萬代之式中書監高閭議以為帝王之祚百代可知運代相承書傳可稽雖祚命有長短德政有優劣至於受終嚴祖殷薦上帝其致一也故敢述其前載舉其



大略臣聞居尊據極允應明命者莫不以中原爲正  
統神州爲帝宅苟位當名全化迹流洽則不專以世  
數爲予奪善惡爲是非故堯舜禪揖一身異尚魏晉  
相代紀運少殊桀紂至虐不廢承曆之敘厲惠至昏  
不闕周晉之祿計五德之論始自劉向一時之議三  
家致別故張蒼以漢爲水德賈誼公孫臣以爲土德  
劉向以爲火德以爲水德者正以當有水溢之應則  
不推運代相承之數也以爲土德者則以亡秦繼曆  
相卽爲次不推逆順之異也以爲火德者懸證赤帝  
斬蛇之符弃秦之暴越惡承善不以世次爲正也故

以周爲火德自茲厥後乃以爲嘗魏承漢火生土故  
魏爲土德晉承魏土生金故晉爲金德趙承晉金生  
水故趙爲水德燕承趙水生木故燕爲木德秦承燕  
木生火故秦爲火德秦之未滅皇魏未尅神州秦氏  
旣亡大魏稱制玄朔故平文之廟始稱太祖以明受  
命之證如周在岐之陽若繼晉則晉亡已久若弃秦  
則中原有寄推此而言承秦之理事爲明驗故以魏  
承秦魏爲土德又五緯表驗黃星曜彩考氏定實合  
德軒轅承土祖木事爲著矣又秦趙及燕雖非明聖  
各正號赤縣統有中土郊天祀地肆類咸秩明刑制



禮不失舊章奄岱踰河境被淮漢非若齷齪邊方僭擬之屬遠如孫權劉備近若劉裕道成事繫蠻夷非關中夏伏惟聖朝德配天地道被四海承乾統曆功侔百王光格同於唐虞享祚流於周漢正位中境奄有萬方今若弁棄三家遠承晉氏則葺中原正次之實存之無損於此而有成於彼廢之無益於今而有傷於事臣愚以爲宜色尚黃定爲土德又前代之君明賢之史皆因其可褒褒之可貶貶之今議者偏據可絕之義而不錄可全之理所論事大垂之萬葉宜弁集中祕群儒人人別議擇其所長於理爲悉祕書

丞臣李彪著作郎崔光等議以爲尚書閭議繼近秦氏臣職掌國籍頗覽前書惜此正次慨彼非緒輒仰推帝始遠尋百王魏雖建國君民兆朕振古祖黃制朔綿迹有因成此帝業神元爲首案神元晉武往來和好至於桓穆雒京破亡二帝志摧聰勒思存晉氏每助劉琨申威弁冀是以晉室啣扶救之仁越石深代王之請平文太祖抗衡苻石終平燕氏大造中區是則司馬祚終於郊鄉而元氏受命于雲代蓋自周之滅及漢正號幾六十年著符尚赤後雖張賈殊議暫疑而卒從火德以繼周氏排虐羸以比共工殺暴



項而同吳廣近蠲謬偽遠卽神正若此之明也寧使  
白蛇徒斬雕雲空結哉自有晉傾淪暨登國肇號亦  
幾六十餘載物色旗幟率多取黑是又自然合應玄  
同漢始且秦弁天下革躬法度漢仍其制少所變易  
猶仰推五運竟踵隆姬而况劉石苻燕世業促編綱  
紀弗立魏接其弊自有夷典豈可易漢之承木捨晉  
而爲土耶夫皇統崇極承運至重必當推協天緒考  
審王次不雜以僭竊參之強狡神元旣晉武同世桓  
穆與懷愍接時晉室之淪平文治太廟號太祖抑亦  
有繇紹晉金德孰曰不可而欲次茲僞僭豈非惑乎

臣所以懷懷惜之惟垂察納詔令群官議之十五年  
正月侍中司空長樂王穆亮侍中尚書左僕射平原  
王陸叡侍中吏部尚書中山王王元孫侍中尚書駙  
馬都尉南平王馮誕散騎嘗侍都曹尚書新秦侯游  
明根散騎嘗侍南部令鄧侍祖祕書中散李愷尚書  
左丞郭祚右丞霸城子衛慶中書侍郎封琳中書郎  
泰昌子崔挺中書侍郎賈元壽等言臣等受勅共議  
中書監高閭祕書丞李彪等二人所議皇魏行次尚  
書高閭以石承晉爲水德燕承石爲木德以秦承燕  
爲火德大魏次秦爲土德皆以地據中夏以爲得統



之徵皇魏建號事接秦末晉既滅亡天命在我故因  
中原有寄卽而承之彪等據神元皇帝與晉武竝時  
桓穆二帝仍修舊好始自平文逮于太祖抗衡秦趙  
終平慕容晉祚終於秦方大魏興于雲朔據漢并秦  
承周之義以皇魏承晉爲水德二家之論大略如此  
臣等謹其參論伏惟皇魏世王玄朔下迄魏晉趙秦  
二燕雖地據中華德祚微淺竝獲推敘于理未愜又  
國家積德修長道光萬戴彪等職主東觀詳究圖史  
所據之理其志難奪今欲從彪等所議宜承晉爲水  
德詔曰越近承遠情所未安然考次推時頗亦難繼

朝賢所議豈朕能有違奪便可依爲水德祖甲辰臘  
後周閔帝元年春正月辛丑卽天王位是日魏槐里  
獻赤雀百官奏議云帝王之興必更正朔明受之於  
天革民視聽也逮于尼父稽諸陰陽云行夏之時後  
王所不易今魏曆告終周室受命以水乘水實當行  
錄正用夏時式遵聖道惟文王誕玄氣之祥有黑水  
之讖服色烏制曰可

隋高祖受禪召崔仲方與高頴議正朔服色事仲方  
曰晉爲金行後魏爲水周爲木皇家以火承木得天  
之統又聖躬戴誕之初有赤光之瑞車服旗牲竝宜



用赤又勸帝除六官請依漢魏之舊帝皆從之開府  
盧賁奏改周代旗幟更爲嘉名其青龍騶虞朱雀玄  
武千秋萬歲之旗皆賁所創也

開皇元年六月癸未詔以初受天命赤雀降祥五德  
相生赤爲火色其郊及社廟衣服色之議而朝會之  
服旗幟犧牲各令尚赤戎服以黃七月乙卯帝始服  
黃百僚畢賀

唐玄宗開元中有上書請以皇家爲金德者中書令  
蕭嵩奏請集百僚詳議侍中裴光庭以國家符命久  
著史策若有改易恐貽後學之誚密奏請依舊爲定

乃下詔停百僚集議之事

臣欽若等言  
唐初事闕

天寶九載七

月詔曰三王繼統質文旣不相襲五德承時服色遵  
於所尚至於旗嘗改制驛翰異宜所以表軍國之容  
合聲名之度事之大者安可因循而已焉國家膺推  
組之期纂黃中之曆憲章垂範運旣屬於維新旗幟  
同色義必在於革故頃者俯納群議式明統緒故得  
天人致和風雨時若豈朕躬菲德克廣睿圖實累聖  
鴻休允膺景運稽古之大旣有昭明文物所資理宜  
詳正其諸衛應隊仗所用緋色幡等竝改爲赤黃色  
庶克遵於通變諒有叶於從宜其諸節度使并管內



軍使等亦宜准此

九月處士崔昌上封事以國家合承周漢其周隋不合爲二王後請廢詔下尚書省集公卿議昌負獨見之明群議不屈會集賢院學士衛包抗表陳論上心遂定乃求殷周漢後爲三恪廢韓介鄒等公以昌爲左贊善大夫包爲虞部員外

十載五月諸衛幡旗色始改爲赤黃

十二載五月巳酉復以魏周隋依舊爲恪及二王後其本封韓介鄒等公如故初崔昌上封事推五行之運以皇家土德合承漢行自魏晉至隋皆非正統是

閏位書奏詔公卿議是非相半時上方希古慕道得昌疏甚與意愜宰相林甫亦以昌意爲是會集賢院學士衛包抗疏奏曰昨夜雲開四星聚於尾宿又都堂會議之際陰霧四塞緒言之後晴空萬里此蓋天意明國家承漢之象也上以爲然遂行之及是楊國忠根本林甫之短乃奏云周漢遠不當爲二王後衛包助邪獨與林甫計議大紊彝倫上疑之下包獄案鞫遂貶爲夜郎郡夜郎尉崔昌爲玉山郡烏雷尉並員外置

代宗永泰中歸崇敬爲膳部郎中時有術士巨彭祖



上疏云大唐土德千年合符請每四季郊祀天地詔禮官儒者議之崇敬議曰案舊禮立春之日迎春於東郊祭青帝立夏之日迎夏於南郊祭赤帝先立春十八日迎黃靈於中地祀黃帝秋冬各如其方黃帝於五行爲土王在四季生於火故火用事之末而祭之三季則否漢魏周隋共行此禮國家土德乘時亦以每歲六月土王之日祀黃帝於南郊以后土配所謂合禮今彭祖請用四季祠祀多憑緯候之文且據陰陽之說事涉不經恐難行用

周太祖廣順元年司天上言歷代帝王以五運相承

前朝紹承水德今國家建號周朝合以木德代水准

經法國以歲暮爲臘今曆日所行合以今年十二月

二十二日丁未爲臘從之

臣欽若等曰晉承後唐漢承晉本文不載承土之德

據周稱木德卽是漢爲水晉爲金以繼唐土德也

冊府元龜

帝王部



